

JASMIN DUVNJAK

**Delegat u Domu naroda
Parlamenta Federacije Bosne i Hercegovine**

Sarajevo, 23.12.2021.godine

Bosna i Hercegovina
Federacija Bosne i Hercegovine
**PARLAMENT FEDERACIJE
SARAJEVO**

Prilijeno: 23-12-2021			
Org. Jvd	Broj	Priloga	Vrijednost
02	- 02 -	2443	21

**PARLAMENT FEDERACIJE
BOSNE I HERCEGOVINE
DOM NARODA
n/r gđin Tomislav Martinović, predsjedavajući**

**PREDMET: PRIJEDLOG ZAKONA O DOPUNI ZAKONA O ELEKTRIČNOJ
ENERGIJI U FEDERACIJI BOSNE I HERCEGOVINE - hitni postupak,
- dostavlja se**

Na osnovu člana 187. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03, 21/09 i 24/20), kao ovlašteni predlagač, podnosim radi razmatranja i usvajanja, **PRIJEDLOG ZAKONA O DOPUNI ZAKONA O ELEKTRIČNOJ ENERGIJI U FEDERACIJI BOSNE I HERCEGOVINE - hitni postupak.**

Delegat

Jasmin Duvnjak s.r.

ZAKON
O DOPUNI ZAKONA O ELEKTRIČNOJ ENERGIJI U FEDERACIJI BOSNE I
HERCEGOVINE ("SLUŽBENE NOVINE FEDERACIJE BIH", BR. 66/13, 94/15 I 54/19)

Član 1.

U Zakonu o električnoj energiji u Federaciji Bosne i Hercegovine ("Službene novine Federacije BiH", br. 66/13, 94/15 i 54/19), iza člana 16. dodaje se novi član 16.a. koji glasi:

Član 16.a.

„Izuzetno od stava (2) člana 16. Zakona, ukoliko dođe do poremećaja na tržištu električne energije na način da se cijena snabdijevanja električnom energijom za kvalifikovanog kupca poveća ili smanji za više od 50% u odnosu na prethodnu godinu, Vlada Federacije može posebnom odlukom ograničiti povećanje ili smanjenje cijena snabdijevanja električnom energijom, pri čemu se isto odnosi za Ugovore sa godišnjim trajanjem ili duže.“

Član 2.

Ovaj zakon stupa na snagu osmog dana od dana objavljivanja u "Službenim novinama Federacije BiH".

OBRAZLOŽENJE

UZ ZAKON O DOPUNI ZAKONA O ELEKTRIČNOJ ENERGIJI U FEDERACIJI BOSNE I HERCEGOVINE ("SLUŽBENE NOVINE FEDERACIJE BIH", BR. 66/13, 94/15 I 54/19)

I USTAVNI OSNOV

Ustavni osnov za donošenje Zakona o dopuni Zakona o električnoj energiji u Federaciji Bosne i Hercegovine („Službene novine Federacije BiH“, br. 66/13, 94/15 i 54/19), sadržan je u odredbi člana III.1. tačka f.), koji je izmijenjen amandmanima VIII, LXXXIX i CVI Ustava Federacije Bosne i Hercegovine, prema kojoj je u isključivoj nadležnosti Federacije BiH utvrđivanje energetske politike, uključujući raspodjelu između kantona, te osiguranje i održavanje potrebne infrastrukture i člana IV. A. 20. (1) d) Ustava Federacije BiH, prema kojem je Parlament Federacije Bosne i Hercegovine, uz ostala ovlaštenja predviđena Ustavom, odgovoran za donošenje zakona o obavljanju dužnosti federalne vlasti.

II RAZLOZI ZA DONOŠENJE

Razlozi za donošenje Zakona o dopuni Zakona o električnoj energiji u Federaciji Bosne i Hercegovine ("Službene novine Federacije BiH", br. 66/13, 94/15 i 54/19), sadržani su u članu 1. stav (1) Zakona o električnoj energiji u Federaciji Bosne i Hercegovine ("Službene novine Federacije BiH", br. 66/13, 94/15 i 54/19 – u daljnjem tekstu Zakon), kojim je, između ostalog propisano da se ovim Zakonom uređuje funkcionisanje elektroenergetskog sektora, elektroprivredne djelatnosti, razvoj tržišta električne energije, **regulisanje tržišta**, opći uslovi za isporuku električne energije, planiranje i razvoj, izgradnja, rekonstrukcija i održavanje elektroenergetskih objekata, nadzor nad provođenjem zakona i druga pitanja od značaja za obavljanje elektroprivredne djelatnosti u Federaciji Bosne i Hercegovine.

Cijena električne energije izrazito je volatilna, čemu najbolje svjedoči činjenica da su trenutne tržišne cijene višestruko više od cijena električne energije u istom razdoblju prethodne godine. Razlozi promjene cijena električne energije na tržištu su višestruki i zavise od više faktora kao što su vremenske prilike, evropska energetska politika, dodatni okolinski troškovi proizvodnje, globalna kretanja cijena energenata, stanje na tržištu emisijskih jedinica stakleničkih gasova, povećana potražnja i smanjena ponuda na tržištu.

Neki od navedenih faktora imaju veći, a neki manji utjecaj na kretanja cijene električne energije u Federaciji BiH.

Kako bi se izbjegli poremećaji u privredi i osigurala stabilnost privrede zbog naglog porasta cijena električne energije (otpuštanje radnika i povećanje cijena ostalih proizvoda zbog povećanja cijena električne energije), ovom dopunom Zakona omogućava se Vladi Federacije BiH da ograniči rast ili smanjenje cijena električne energije u Federaciji BiH.

S obzirom da je odlukom DERK-a otvoreno tržište električne u BiH, te svi snabdjevači postaju učesnici na tržištu električne energije gdje slobodno ugovaraju količinu, cijene i uslove isporuke električne energije, potrebno je stvoriti pravni osnov za regulisanje tržišta u izuzetnim situacijama koje prijete da će nanijeti veću štetu pravnim licima koja nisu elektroprivredni subjekti u Federaciji BiH.

Zakonom o električnoj energiji u Federaciji Bosne i Hercegovine propisano je da se, elektroprivredne djelatnosti proizvodnje električne energije radi prodaje na tržištu i snabdijevanja električnom energijom kvalifikovanih kupaca, obavljaju prema pravilima kojima se uređuju tržišni odnosi u kojima elektroprivredni subjekti slobodno dogovaraju količinu, cijenu i uslove isporuke električne energije, zaključenjem kratkoročnih i dugoročnih ugovora ili direktnim učešćem na organiziranom tržištu, te je propisano da se elektroenergetski subjekti imaju obavezu pridržavati se pravila djelovanja tržišta koja su propisana za tržište električnom energijom.

Kako je došlo do enormnog povećanja tržišnih cijena električne energije na berzama električne energije i kako se na osnovu ovih tržišnih cijena formiraju cijene električne energije za tržišne kupce električne energije, došlo je do velikog povećanja cijena tržišnim kupcima u odnosu na prethodni ugovor o snabdijevanju električnom energijom.

Veliko povećanje cijena predstavlja udar na poslovanje tržišnih kupaca, može doći do ugrožavanja opstojnosti mnogih privrednih subjekta, smanjenje broja radnih mjesta, dodatnih poskupljenja i pada životnog standarda.

Zbog toga je potrebno Zakonom o električnoj energiji uvesti mogućnost privremene regulacija cijena električne energije, na način da se ograniči iznos povećanja ili smanjenja dok traje poremećaj na tržištu električne energije

Uzimajući u obzir sve navedeno, odnosno uvažavajući razloge koji su navedeni u ovom obrazloženju, a iz kojih je vidljivo da bi nedonošenjem ove dopune zakona mogla nastati šteta po Federaciju Bosne i Hercegovine, kao i činjenicu da se radi o Zakonu koji je već bio na razmatranju u Parlamentu Federacije Bosne i Hercegovine, predlaže se donošenje Zakona o dopuni Zakona o električnoj energiji u Federaciji Bosne i Hercegovine po hitnom postupku.

III FINANSIJSKA SREDSTVA

Za provođenje **Zakona o dopuni Zakona o električnoj energiji u Federaciji Bosne i Hercegovine** nije potrebno izdvojiti posebna sredstva u Budžetu Federacije Bosne i Hercegovine.